

Markatti Suldaanga Jiir

id weeli markatta menon, tar wiida suldaanga markikenon, wilidterekkoon kunin. in wilidli wiida orgon gashiima menon. dib weekka wiida in taffaab kuttongoon hisseada, aaba ir hiddo fa juu iyyon, aygon iddan fa juure iyyon. lalaan fiyyoose iyyon lalaa, aygon iddan faa juure iyyon. takkon kiyyedon. tanynya juwagoon taffaab awoo torjooron. wildikkon in suldaan noogka jerrog uffirooson. in taffaabinnaan awwotoon haaja ennatirekka uffilog dummin. idli awwolog kororow kororowiy aawongoon hississan. teriinnaan haraami haraamiy iigintaan teriin kutta juwellagoon uffilog dowwa falooson. man tariin uffilog dowwa falella, awwoguuli ooyiiltoon tollinnan, wildikkon shaallog gumurratoon tollin. meska awwoguu takka galabsani, kandig keffaltoon oosagoon suttiiy taffaabin gumurka meredon irbididinnanaya. taffaabin gumurka meredagoon enneda nogon. banynyisan, eywaa markatti uwoo messan. jittalog wiida irbiredeeg meskissan konyga kummun. markatti uwoo messan woon uul inga fa hikkeero? weziir tanga iigatiron in markatti uwuttiga hikkikkoog fa dummiroo? banynyon: shongir weekka fekka diigdakachcha shaaral gullij, dereenya sokkikoon haraamiikir fa dummil. kiragoon gafiirka menjirooson. in wilid hikkiroo, jezma tan weekka koffechcha tawwo koyriil sukka juwa, koyriiltoon gunussaree tan weekka dukka in jezman jerra kaabechcha juu sabaah el heer, sabaah ennuur, maskafiishshoo maska nuwwisooy iigintaani tanynya man gunussaree tannogo jezmakka toboga shongirka dereenyimmeen nadiifakir doolechchon. juu noogiddo shongirka dukkij isken. shongir wetti ardil daammun. gafiir, naay dereenyo? wee dereenyaammun. woon shongirroo? naarbe? ir dereenyokka nalaammunname? wettee dereenya shongir weekka sokkaammun? jemiyyan hussan shongirin kochchilog tanynyafiyon. woon inga alagka uu fa hikkeero? inna suldaani, kamterekka seyyedaagin, kamin asterekka, in shongirka doolsiin baadtoon yoomeen talaatalog man suldaanin kamikka markeda juwa noogiddo goja angareel arichch erdimjagoon tanneenga kaashe iigoosagoon shaaddo falechchon. suldaangon kamikka kaara maaron. kaara maaragoon ideen duwwiterekka bassaasakir idrooson. juu iron in kamin gojafiyenn agarka bassasa eleda taakkani, ikka deheb shooyir weekka fa teele iyyon. ideengon fala juu issigjin noogiriila, ittirka kunnoo? hey ur iigka kunnoo? imiidta kunnoo? ingeentaan noogiriil bassaasanga torjooron. noog tennis juwon. wilid aagmun, tanneengon arjin kaashaad weekkuug tira kabkachcha, shettee tariin kaara kaagsiinga tichcha, arij dessi weekkuugoon golgol idachchatira juu ingoon noogiddo okkir kabe iyyon! wilid irbimmun. falafiingoon wilid takka baabil elooson. habooba iyyon, in minaa? ineen deenona iyyon. walla aneen bahiila iyyon arij angareelog menjillalee ikka in arij dikke uwoo walla tuskoterekka tee, kir ay ikka fa juu jeegateereeni. inga bassaasakir suldaann

idredaagmeeni inga minaaray daarii? tar arichcha talla idre iyyon. kiyveda juwagoon yoo iyyon ir aygal dakanal ideennanga firgii? arichcha idachchagoon ideen duwwig gojooson. ideen duwwin gumurka meroosa kamin jelewga sokka usur tanna shaagoottiragoon juu shaaral wiirkoottiron. sultaan fala juukani ideen duwwi shaaral goja wiirkafin kamin jelewikkon usur tanna shaagafin. in minnee in minnee busur tigeer tanga meskissan. debbir yaa weziir iyyon ing aag aawin jezaaga. kutta hamir weekka nenyiroose iyyon, kiragoon beledil shaab mallekka jemmite iyyon kir tar oodal koffoochcha arij weekka gojootichcha, gafiir weekka baabn agilla menjiroosa, sakroochchikan kulli waahed keef tanga hamrin kochchil fa banynyina iyyon. teriin banynyijkangoon ashaar weekka awoottiraa tar idli dummidangaanna iyyon. sultaangon ekkir hamir tan weekka nenyirooson. beled koffafiikka talabeda kiragoon oodanchiil iskiroochchon arichcha gojoosa kulli waahedta dakkan kubee weekka iskiroottichchon. kulli hataban agillagoon gafiir weekka menjiredaagin. sakra kaba kulli waahedin keef tanga banynyerangooson. kulli waahed keef tanga banynyongoon takkon banynyon: aylin aboon toodi, aboon gumurka merokkon aylin. gafiir takka guunyeda baabn agilla aagin. sultaan kamikka gojokkon ay aboon toollin, shongirka ooylog gunussareelog doolokkon ay aboon toollin. ideen duwwig goja kamin jelewga usurra shaagoottira wiirkokkon ay aboon toollin tan aawsiin mallekka sakirra meseljon. man gafiirri takka guunya kaaga, kullu waahedin batti battiy agka galleda neersiin wakitta kutta kir muus weekka kaaga shenebin nussig ganynyooottiron ashaar tannakira fejiirro ken dummalleya. takkon neereda awakka adwa kutta kikkangoon shenebin nussi daammun. kuttagoon ichchikkuuli neerafiijinnan tannin muujbil mallekka sheneb tennig ganynyijatichchon. kiragoon teddan fiyyooson. heerin masha heer tannog dukkon, gafiirikkon sultaanga iigoottiron ashaarakir shenebin nussig ganynyedaagreya. malle kuttagoon shenebin toortig maarissan aag fachchintaan baabil wiida sultaanga iigateennan: salaam aleekum yaa sultaan ketter heerak, uugalee sakirkiroochcha sheneb uunin nussig ganynyi. dummedeeg meskon, inninay irbiredeeg meskon. sultaan banynyon: yakhwaanna, ayl aleetookka ukka fa iigatichchir. ay maana unnig maaris, ullatoon in jellig aawiyi, kawwir banynyookkani, annaskoon fa edkeer mamlaka annin nussigoon fa faayateer. kulli weeli ingon aylina in mangon aylina in. takkon tafaasiillog ekkir iskiroon, aylina iyyon. sultaangon tannaska edkir mamlaka tannin nussig faaya hitmoottiron. gubaallo matto sultaan wee daarintaani, tinon sultaanga olowatiron: markatti weekka dummedeeg meskalee mamlaka innin nussigoon faayatee, innaskoon edke? wildikkon ukkirechchon. awan gitta menjisiin wakittoon, alas weekkoon kibriit weekkoon, gisir weekkuugoon doolechcha sigirka kusa matto torjooron. kiragoon man alaska urra kaaseda, jenbi weellogoon alas weekka biisha menjir uwuttilogoon biisha menjir uwwongaarra iigka urra idir innogoon gisir weekka

kokka mannogoon gisir weekka kokkechcha shebbaaklog sultaan fiyennaan oodal sukka juwagoon tibilka toogatiron. adwa kutta kiikangoon musiiba weeli kochchi tanna menjin. mina iyyon, banynyon: ay esra'iin kuduud illin, esra'iin dawwikkon toora jaaffiinaan nekka ayl inga naaffired. hiddo naaffooyya? iyyon, tar sanduukil toore iyyon. sanduukil idir teree tannog koffa shebbaaklog sokka wiirka sigir tan idir tinolog amangaarro iskiroosagoon juu noog tanna fiyyooson. fiyagoon fejiro sultaanga iigatiron sanduuk dawwi weeyi amangaarro fiinaanekka weekkuug olowja juu ekkir. nafar gorjo walla kolod sanduukka baattiredagoon kashshan sultaandogo. jeebiltoon tereeg oosagoon kaddatiron. gallireda juukangoon id weeli mashshil kiddafin shenebin geddi mashshin tuul filittin. in mina iyyon? wildikkon iigatiron: aylin, ayl ikka ingiss man iriin banynyisiin karamiddo. sultaan tinonikkon takka iigatiron: ingir mashshil kiddarummunneya annaskoon edkiss mamlaka annin nussigooon faayatiss. matton sultaangon wilidta iigatiron aygon mamlaka annin nussig faayoottiss. wildikkon iigatiron: mamlaka innin nussig firgimunneen kutta mukka nog!